

M66. 31^d



9

Vorstandt des worts Pauli.

Ich begeret ein vorbannter seyn
von Christo/ vor meyne
Brüder. Rhoma:9.

was hant und achte.

Andres von Carolstat.

M. D. XXiiiij.

Zhen.



mbb. 31 d. i

Faint, illegible text, possibly bleed-through from the reverse side of the page. The text is arranged in several lines and appears to be a list or index of some kind.





Ich bin in einer collacion guter Brüder /
gefragt / wie differ spruch Pauli sol ver-
standen werden. Ich begerte ein Ana-
thema oder vorbaiter seyn / von Christo
für meine Brüder. Vnd habe mit freys-
hem vnd vngepundtem geyst / auff ges-
thane frage / also geantwort. Paulus
hat nicht recht gesagt / nach ein rechtgeschaffen gemüt
gehabt / wen er spricht. Ich wil vō Christo vorbant sein /
vmb willen meiner Brüder. Aber disse antwort hab
ich nit dermassen geben / das ich Paulū wolt vorsprechē.
Sondern nür die yhene die sagen. Das Paulus yn der
achte Christi sein wil / für seine Brüder. In der meynung /
das er vil eher ein grewel vnd vorfluchter / von Christo
begert sein / ehe er in vorderbung / seyner Brüder / wolt be-
willigen. Vnd itz gedachte / wollen daraus ein schlus-
red machen / disses lauts. Man sol die Brüderliche lieb
so hoch achten / vnd brauchen / das einer vil lieber / etwas
wider Got thun solt / oder zuthun gestatten / denn das
er seyne Brüder erzömet / oder ergert. Vnd komen gleych
dar auß / yn den yrthumb / das sie sagen. Man solle auch
dem negsten zū liebe / die ding lassen stehn / die yhm zū
eynem strigt vnd ergernis gelegt / vnd wider Got seyn /
als man itz vō den vorfluchten bildern spricht / das man
die selbige sal lassen bleybē / vff das die vnuoristendigen /
nit betrübt oder geergert werden.

In dem symm ligt schir die ganze welt. Vnd yederman
helt den spruch Pauli dafür / als wer Paulus auch so ner-
risch gewest / das er / in solchen vnd gleichē sachen / lieber
wider Got seyn wolt / dan fleischliche lewtz betrüben.
Nein nit also. Dann / wo Paulus disse meynung hette
gehabt / das er Got vorzömen / vnd den vnweyssen / oder
vnzüchtigen menschen wolgefallen wolt / so wolt ichs
(yn diesem fall) mit Paulo nit halten / auch öffentlich
A ij sprechen

Rho 9.

Falsche
schlusred

- sprechen/ das Paulus laher/ vngerecht were. Vnnd das Paulus / nicht allein wider sich selbst / sondern dartzu / wider Christi vñ alle Prophetē vñ Aposteln strebē thet.
- Math. 10.** Christus hat ein schwert bracht / vñ wil vns / in sonderheit / von solchen brüdern abschneiden / vñ teylen / die ein gotloses wesen vñ leben führen. Vnd spricht. Welcher mit vater vnd muter hasset / vñ mir nachuolgt / der kan oder magt mein diener nicht sein etc. Sollen wir vater vnd mutter hassen / vnd yhnen nit zugefallen leben / in allen stücken / vñ gleichwol / den gotlosen brüdern volgen / oder yhnē etwas wider gotis willē nachlassen / vñ vorhencfē? Weiber vñ kinder / eltern vnd vnserer aller negste freunde (die wir sunst schuldig sein zū ehren vnd lieben) müssen wir vmb gotis willen lassen. Sollen wir dan / durch die finger sehen vñ der losen brüder leben stercken / wider gotis lob vnd herlickeit? Müste mit Adam den garten des wollüsts vorlassen / dūmb das er die stymē seines weybes mehr hört / dan Gotis gebott? Vnd solte doch eines nerischen bruders torheyte / wider Got sehen / vñnd sie mit gleicher that / oder nachuolgung stercken / oder dreyn be- willigen? Wie bestunde differ spruch Pauli. Wen ich menschen gefallen wil / so kan ich kein knecht gotis sein?
- Gal. 1.** Was bittet ich auch teglich zū Got. Dein will geschē / wen ich den willē meynes bruders / wider gotis / gestattē oder vorteydigen möcht? vnd wolt das böß / mitwillig vorhencfen / des ich von got beuelh hette / abzūnehmen? sonderlich / wan ichs abnemen kōnte.
- Matth. 6** Darumb sprich ich noch. Wen Paulus einen solchen stumpffen vnd widerchristlichen synn gehabt hette / das er vns durch seine lahr in die meynung / vñnd an den ort bringen wōlt / do wir leuthen zugefallē / wider got handeln möchten / so wōlt ichs mit yhm nicht halten. Vñnd mich des brauchen / das er saget. So ich selbst / oder ein Engel vom hymel heraber kēm / vnd leret anders / so sol er ein verbannter sein. Ich wolt
- Gen. 3.**
- Gal. 1.**
- Matth. 6**
- Gal. 1.**

Ich wolt auch frey vnd nichts minder Paulum / dan
einen Engell richten. Dieweyl Paulus selbest / mir / vn
yeglichem / ein solche macht geben hat / das wir Engell
vnd menschen vorbannē dörffen / wo sie anders lereten /
dan gotis ware reden inhalten. Der geistlich ist (vom **1. Cor. 2.**
geyst Gottis / vnd Christi) der vermach alle ding virey
len. Die lebentigen vnd die todten / so sich mit yhm bes
prechen. Drumb wolt ich der heyligkeit Pauli / nicht
schonen / wenn er wider sich selbs / oder wider Christus
laher / wünschen oder schreyben dörfft.

Ich aber weis / das die welt Paulo gewalt thut / vnd
legt yhm auff / das er nie gedacht hat. Nemlich eynen
solchen widerchristlichen synn / den Paulus / als eynen
grewel fliehen würd / so er kegenwertiglich were / vnd
hördte yhm ein solche böse laher / zu messen. Ich weis **Rho. 9.**
das Paulus eynen andern synn / vnd meynung hat / auß
der vsach / dz er spricht. Ich sage die warheit in Christo
vnd liege nicht. Vnd das gibt mir mein gewissen ein ge
zeugnis / durch den heyligē geist / das ich einen grossen vn
stetten schmerzen hab / in meinē hertzen / für meyne Brü
der. Ich herte mir selber gewünscht / ein vorbanter zu
sein / von Christo für meine Brüder ic.

Paulus spricht. Ich rede die warheyt in Christo / vnd
liege nicht. Darauff frag ich / abs möglich sey / das einer
warheit / in der warheit rede / vn wolt yhm etwas / seinē
Grunder zu wollust / wünschē / das wider die warheit gotis
wehrt. Wie kan der / mit der warheit stehn / der wider die
warheyt steht? Weyl ich aber nit zweyfell an dem / das
Paulus / seinen gerechtē schmerzē / in d warheit geklagt.
Hab ich auch nicht zweyfell / an dem / das / das leyden
Pauli / vnd sein schmerzen / nach Christus beger / vnd
nicht wider Christus willenn gewest sey. Weyl er
Christo / seyne Israhelytische / gewinnen vnd anhengig
machen wolt.

A ij Dartzu

Rho.9.

Rho.8.

Darzu gibt vns die hefftige betewung / vnnnd das
schwinde getzeucknis Pauli / ein anleitung / was Paulus
vor ein leyden vnnnd schmerzen gehabt / vnnnd warumb er
eine grosse vnnnd stehte angst / leyde. Nemlich / das sie
Christum nicht erkennen vnd annehmen wolten. Der
halben / spricht er. Mein gewissen gibt mir getzeucknis /
durch den heyligē geyst / das ich grossen schmerzen hab /
für meyne brüder. Nicht in der meynung / das Paulus
seiner vorigen rede / vorgeessen hett / die weyl er kurtz da
vor sprach. Was kan vns von der liebe Gotis scheyden?
Der todt? Das leben? Regenwertig ding? Zukünfftige?
Oder engeln? Oder ist irgent ein creatur so starck oder
köstlich / das sie vns / vom der liebe Gotis / absondern
magt? welche ist in Christo Jesu? Solt ich glauben /
das Paulus von Christo / ein widerspenstiger ban / oder
in der achte Christi / sein wolt / vmb der brüder willen
des fleisches / wenn er kurtz zū vor saget / das yhne / weder
engeln / nach irgent ein creatur / vō der lieb Christi schey-
den / vormack. Es ist wol war / das Paulus ein vor-
banter begert zu seyn / von Christo / vmb einer Israheli-
tischen creatur willen. Das aber / ist nicht war / das er
vom Christo / stehn / vnnnd wider Christum sein wolt.
Darumb müssen wir / den synn Pauli / recht vorstehn /
vnd mit nichte Paulum wider Christum stellen.

Welcher achtung hat / vff die vrsachen / der heyligen
reden / so Gotis knechte gesetzt haben / der geht wol / vñ
one beschwerung. Die vrsach aber / steckt etwan tieff /
vnder dem büchstaben / vnd also tieff vnd vordeckt / das
sie kein menschlich auge sehen kan. Alhie aber / ist sie nit
so tieff / oder vormantelt.

Warumb vrsach der erlitten schmerzen Pauli / ist disse. Das
Paulus vō Christus den Juden in sonderheit / zū heyle vnd selickheit /
herzen ge kommen war / vnd das Got seine vberschwengliche / vnnnd
traurt. väterliche liebe / gegen den Judē / bezeyget / das er seinen
sohn vmb

sohn/ vmb ir erlösung gesandt hatt. Vnnd das Israel
diz nicht wolt vorstehn. Sondern/ also die heilmachung
Christi vorlieren/ der doch auß yhnen/ nach dem fley sch
geborn war. Vnd es ist war/ das noch nicht möglich ist/
weñ einer der welt bößheit sihet (welche Got durch sey
nen sohn erlost) vnd merckt/ das sie so vndanckpar ist/
vnd das sie sich/ der sendung Christi/ nichts nütz machen
wil/ sondern alle liebe des vaters/ vnnd des sohns/ vor
achten/ vñ dazu/ öffentlich/ wider Gotis willen/ wider
Gotis herlick eyt/ in eigener vorderbnis bleyben.

Ich weis nicht/ ab ein creutze/ höher vnnd bitterer
sey/ denn das/ das der gleubige/ der gotlosen wesen/ vor
seinen augen sehen muß. Vnd das sie alle wolmeynung
vnnd gütheytten Gotis/ vorlachen/ vnnd vorspotten.
Vñ/ ap gleych ein teil vnser creutzes höher wär/ dan
diss creutze/ das die liebe wircket/ so weis ich dankest/
das kein creutze lautterer ist. Vnd das kein aufgestrack
ter schmerz/ dem menschen für komen kan/ den der/ der
auß götlicher liebe/ gegen Got vnnd dem nechsten auß
fließet.

Ly was kan den liebreichē glauben/ oder glaubreiche
liebe/ schmerzlicher anfechten/ vñ bitterlicher mit laut
terer wermüt trencken/ dann das sich die welt/ götlicher
gunst/ so schentlich vorzeyht/ vnd thut iren eygen nütz
vorachten? Drumb gleub ich/ auß der massen wol/
das Paulus/ einen steten vnd grossen schmerzen/ gehabt
hab/ drumb/ das er sehen muß/ das got der vater/ so vil
wolt haten den Israelischen erzeyget vnd beweyset. Vnd
das Israel sein hauptstück warhafftiger seligkeit vnnd
heyls voracht. Denn Paulus vorzelt auch manicher
ley götlicher gaben/ mit welchen/ Got/ den Israel bes
gabet hat. Als nemblich/ Got der herr/ gab dem volck
Israel/ sein gesetz/ sitten/ gebot/ ceremonien/ vorheisch
ung/ vnd nam es vor seine erlich volck an/ vñ hub es vber
alle vöcker

alle vöcker / zu letzte / sandt er auch seinen sohn / Jesum
von Nazareth / vnd ließ yhn / auß yhnen geborn werden
vnd vmb irer sünde willen vorfluchen / creutzigen / vor
spotten / vñ ermordten. Vnd es war doch alles verloren
vnd nichts angewendt. Ober das / wolten sie Keyne wol
that behertzen / sondern dazü / sich / wider yren heyland
setzen / der doch irenthalben zusterben / bereytt war. Als
sie auch sich / tedtlich vnd grewlich wider setzten / vnd
Gotis sohne tödten:

Solte das Paulum nicht betrübt haben? Sonderlich
als er seiner mit jüden / vorstockten mit sah / weil sie vor
stockt / vñ das sie vorharlich / auff yrer Bosheit blieben
vnd durch ire grewliche Bosheit / nicht erkennen / vnd
sich zu dem nicht keren wolten / den sie one schuldt ers
mördten / der yhnen / iren todtschlag / zuuorgeben bereitt
war / vnd gütwillig war / sie zu heyligen vor Got seys
nem vater.

Bey mir / hett Paulus seiner grossen Bezeugnis / vnd
Hoher bedingung gar nichts bedörfft / ich wolts yhm
one das / gern g leubt habe / das sein hertz volles schmerz
zens vnd leydens war / für seine Brüder Israel. Das
aber Paulus sich / mit den vndanckbarn / vñ widerspen
stigen / solt wolken geselt / vnd wider Christum / oder wi
der die warheyt / begert haben / das er (wie sie waren)
ein vorbanter grewel sein wolt / den Got hasset / vnd
der wider Got strebet / das g leub ich nit / vnd kans nit
g leuben. Drumb müssen wir eynen rechten synn
Herans lesen.

Das wort Anathema / hat zweyerley bedeutnis. Es
heyst ein auffgehengt opffer als wir izt ein zeytlang
opffer in den vormeynten Gotis herosern / liesen auff
henccken / oder auch selber auff henccken. Es heist auch
ein ban / ein grewel / ein vorfluchung. Das ist etwas / das
seiner Bosheit halben / auß gemeinschaft der heyligen
gestossen

gestossen vnd vorworffen werden solt.

Wenn man den ersten vorstandt / oder synn alhie / in dem gehandelten wortlein Anathema / annehm / als er auch wol anzunemen ist / so wer der spruch Pauli leicht / vñ hette disse meynung. Das Paulus für seine Brüder / auß Israel / vil lieber / wolt auffgehencft sein / als ein opffer / dan mit solchem grossen schmerzen / ire Bossheyten vnd vorstocktes hertz sehen. Vnd ich weys das der rechte glaub / lieber das hertz zerpalten wolt / dann das er / solche freuenliche vorachtung / götlicher woltthaten / sehen sol / sonderlich / wen die Bosshheit / fürtfert / one auff hören. Vnd ein izlicher glaubiger / solt lieber sterben / dann bey solchen gotlosen menschen sein / als man sihet in den geberden oder leyden Dauids / vñnd der andern Knechten Gottis. Art des rechten glaubes

Nedoch ist alhie vnther scheyt / vnd weyße gehalten / das man den armen leuten / erstlich wünschen solt / das sie Got wolten erkennen / vnd die seligkeit Christi begeren. Auch in solcher hertzlicher günst / das einer gern sterben wolt / das sie anfangen zü begeren / vñ erkennen. Vñnd wolt das er / als ein auffgehencft opffer wer / vff das die arme blindheyte / Got / anfassen wolt erkennen vñ annehmen. Die weil Christus spricht / das ist mein ge / Jo. 15.
Got / das ir / einer den andern liebet / vnd meniglicher sein seele / für den andern setze / als Christus sein seele für vns gesetzt hat / die wir vor auch im finsternis / wider Gotis willen vnd ehre / gingen.

In der weyße vñnd synn / glaub ich wol / das Paulus yhm gewünscht hab / das er ein vffgehencft opffer were / von Christo / für seyne Brüder. Nicht das er / von Gottis vñnd Christus liebe vñnd freuntschafft wolt gescheyden sein. Denn das hieß mit Christo nachuolgen / vñnd sein eygene seele für seynen Bruder setzen / als Christus gesetzt hat / sondern auß dem weg Christi gehn. Es hieß auch
B mit das

mit das creutz Christi suchen / sondern ein eygens. Nicht
 in des vaters willen absterben / sondern in dem willen
 des fleysch. ¶ Paulus hat ye den verstandt Christi
 gehabt. Ich bitt nit für die welt ic. ¶ Paulus hat
 in seinem wünsch / den willen des vaters / vnd des sohns /
 durch den heyligen geyst / vngeweyfelt vormerckt / vnd
 volbringen wollen. Vnd also hat er von Christo / das ist /
 von dem geyste Christi / den götlichen wunsch gehabt /
 das er begert vffgehencft werdē / als ein vffgehencft op
 was ana / fer / welchs die krieichische sprach / ein anathema heisset.
 thema
 Vñ / setze ich / als wer das Paulus meynung gewesen /
 das er ein verbanter von Christo / lieber sein wölt / denn
 das seyne brüder / nach dem fleysch / so vorgeflich / wider
 Gottis günt / wüten / vnd tobten / dannest möchts ye
 nicht / diesen synn haben / das Paulus / den gotlosen brü
 dern zü gefallen / ein abgesunderts glied sein wölt / wider
 Christū / den es müste bald volgen / das yhnen / vil ein ge
 ringere creatur / vō christo gescheidē hett / dan ein engel.
 1. Cor. 5. Auch hat Paulus vns vorbotten / das wir keine gemein
 2. Tess. 3. schafft / mit den habē sollē / die öffentlich wider got lebē.
 Dieser synn lidt sich / das Paulus bey den menschen
 ein verbanter mensch sein wölt / vff das sich seine brüder
 Gall. 3. zü Got kereten / oder wendten. Als Christus auch ein
 vermaledeyhung ist worden. Wiewol die menschen
 Esā. 53. meinten / Got hett Christum verworffen / geschlagen /
 vnd außertzig gesprochen. Aber Christus trug vnsern
 auffatz / vnser schlege vnd sunde. Das aber geschrieben
 stetht / ein verbanter von Got / dringt mich nicht zü hal
 ten / das Paulus von Christo wolt geschieden sein / so wes
 nig Christus sich von seinem vater entfrembt / am holtz /
 do er ein vermaledeyhung ward / vō Got oder bey Got /
 denn Christus was darumb von seinem vater / nicht ab
 geschiden / nach wider den vater / dem er seinen geyst be
 ualch / vnd zü handen stellet / wie wol die schrift spricht /
 Das der

Das der / bey got / vermaledeyhet ist / der am holtz hangt.
Diese wort aber (bey got oder vor Got) zeygen nicht an /
das Christus sich wider seinen vater gesetzt / sondern /
das er vnser sünde / vnser verfluchung / vñ vermaledey-
hung / warhafftiglich / bey got / als vor der welt getragē
hat / vnd nicht allein / ym schein. Als auch Christus /
vorgebung der sünden / warhafftiglich gibet / vnd seyne
gebenedeyhung / vnd andere güter / in der warheyt / vnd
nicht im schein oder wohn mitteylt. So auch / must es
alhie sein / wenn Paulus durch Gottis geyst / begert / ein
verbanter oder bann von Christo zū sein / das er / den hon
vnd spott / warhafftiglich für seine brüder leyden wolt /
den ein verbanter leyden sol. Aber one schuldt / als
Christus / one abdrutt vom dem vater / als Christus. In
fester eynigkeit / mit Got / als Christus. In steter liebe
zū Christo / als Christus zū dem vater hatte. Vnd mit
nichte also / das Christus seynen vater vbergeben / oder
das Paulus Christum vbergeben hette / vom wegen der
armen / ellenden / gotlosen vnd Christlosen menschen.

Paulus begert zū sterbē / vff das er / mit grösserm nütz /
vnd vnvorhinderlich / mit Christo sein möcht / wie möcht
tes denn ye gesein / das er für seine brüder sterben vnd
hangen / vnd von Christo gescheyden sein wolt? Es ist
vnmüglich / das einer den geist christi hab / des sich Chris-
tus ernstlich rümen thut / vnd wider Got / oder wider
Christi sein / oder in einherley weyse wünschen mag / vñ
Christo / oder wider Christum zū sein / in leidender oder
wirkender weise. Die gotis geist habē / die werdē zū got /
mit von Got gefürt. Welcher Christus geyst hat / der ist
Christi / vñ er kan weder mit wortē / noch mit gedäcken /
noch mit der that / one Christū / oder wider Christū sein /
den der geist treibt ihnen / er muß sagen. Ich bin Christi /
vnd ich stehe bey Christo / vnd kan yhm nicht anders
thun / so langer das werck des geysts Christi leydet.

B ij **h** **h** **h**

Philip. 1.

Nu hat Paulus öffentlich gesagt. Das Christus in yhm
sey / vnd auß yhm rede. Darumb ist es vnmöglich das er /
als dann / gewünscht habe / von Christo verbant / vnd
verstoßen sein / do der geist Christi / sein werck in Paulo
auffs höchste treyb / nemblich / do er Christum den Rho-
mern bekant. Wie wol ich / in Keyner abrede bin / dann
das gesein mag. Das ein rechter Christ wünschen darff
das er von Christo / verbant sey / für seine Brüdere / als
oben verzelt ist. Die weyl auch Christus / den bann
vnd verfluchung aller menschen auff sich legt vnd trüg.
Welche yrer sunden halben / von Got dem vater fern vñ
abgesundert waren.

Das aber Christus dem bann vnd seyner absonderung / oder
verfluchung vsach geben hab / darff nyemandts sagen /
denn der / der Christus ere vnd gezeugnis aller Prophe-
ten vnd Aposteln / verwirfft / so von Christus vnschuld
vnd heyligk eyt geschrieben.

Also auch hat Paulus gewünscht / das er / der Brüder
halben / auffgehengt wurd / als eyner / der die acht oder
bann verschult / vnd nit verdient / von der wegen / die das
Anathema verdienen. Nicht das er dem bann vsach
gebe / oder etwas thun wölde / das wider Gottis willen
were / oder das er wünschet zu seyn / als die Christlosen /
oder das er irgent eynem etwas wolt ein zeytlang nach-
lassen / in eynem widerchristlichen wesen zu bleyben.

Nein / Nein. Sondern das er gerne die straff leyden
wolt / welche die Christlose leiden solten / die gotis günst
vnd Christus leyden versprechen / als Christus thet. Al-
les darumb / das die Christlosen Christformig wurden /
vnd ir widerchristlich vñ gotlos wesen zerrück würffen.

Die hebreische sprache / gebrauchet ein wort das heisset
(Jerem) vnd wirt gemeinlich also vertülmetzsch / ana-
thema / zu deutsch bann / oder acht / Got wolt / das die
acht oder bann wider etzliche mißhandler gesprochen /
vnd

vnd gebraucht wurde. Got beualch auch seynem volcke
das sie yre feynde / solten verbannen oder in die achte
thun / welche Got in ire hende geben. Idoch solt vn-
terscheyd zwischen / den feynden / des volcks Israel ges-
halten werden. Welche das volck bannen oder nicht ban-
nen möcht. Es waren auch etliche sunde / die Got so
groß vnd greulich schätzet / das Got / alle die yhene für
bannisch vnd in der acht hielt vnd wolt gehalten haben /
so sich daran vergriffen.

Drümb solt man auch keynen bann oder acht ver-
kündigen / dann nür in götlichen sachen. Auch solt
man nyemandts in die acht sprechen / oder verbannen /
oder kein vrsach des banns wissen / dann alleyn die / die
von Got scheydt / vnd wider Got setzet. Vnd wir solten
Gottis willen so festiglich nach suchen vnd halten / das
man keynen / vmb irgent eyner sunde willen verbanten /
den nür alleine der sunde halben / die got selber verbant /
vnd der acht würdigk gesprochen hat.

Dann Gottis acht ist nicht ein geringe sache / das
vornimb also das hebreisch wort (herem) heisset / todt
schlagen / verwüsten / vertilgen / vnd zü nicht machen.
Dem nach / ist Gottis bann / oder acht / nichts anders /
denn / ein gerichtlicher Sentenz / oder ein ander vireyl.
Durch welches zü recht gesprochen wirt / das der bann
würdigk / ein solcher sey / vnd so greulich gesündt hab /
das er gebannet vnd geächtet werden soll. Der misse-
that halben hat man nür leuthe geächtet vnd verbann-
net / die wider Gottis ewigen willen geschach / die auch
von Got abschneidt vnd so greulich was / das der / der
nach Gottis bild geschaffen war / solt vertilgt werden /
auß dem hauffen der Kinder Adams.

Das wort (acht) sol man mit dem wider synn ver-
stehn vnd es ist ein wider synnigs wort / denn es ist so vil
gesagt als one achtung / also das man des menschen gar

B ij nichts

nichts mehr achten solt / vber welche die acht gesprochen
ward. Drumb war ein solcher mensch zu nichts nutz / dan
zu seiner verderbnis. Man dorffte auch / Keyne dingk /
Kleyder / gelt / viech / gueter / hewser / des verachten oder
verbanten / vberbleyben lassen / sondern alles / mit ein
ander verderben vñ vmbzengen / das dem verbanten zu
stund. Es were dan / das got etwas außgeschlossen het /
Deut. 7. des man schonen mocht / das Got auch zeyten than hat.
vnd. 20.

Daraus lerne vnd sihe / wie der verbant / vor Got /
vngerecht / vnd veracht / vnd von got verworffen ist / vnd
das das wort (Acht) ein widersinnigs wort ist / denn es
heyst also verachten den verbanten / das man gar nichts
achte sol / das sein ist / weder sein person / noch seine gut
ter / man darff sich seiner nicht erbarmen / noch yamern
lassen. Vñ die weil ein verbanter von got / ein solcher
ist / dem Got vnbarmhertzig ist / den auch Got hasset
vnd neidt / vnd wil das er auß seinen augen abgethan /
vnd one barmhertzigkeit vertilgt werd / vnd ganz ver
lesche. Also das sein name / nicht mehr / vnter dem hys
mel bleybe.

Dem nach wer das nicht anders gesagt / Paulus wolt
ein verbanter sein von Christo. Den das Paulus wolt
der barmhertzigkeit Gottis entpern / vnd vor gottis au
gen nicht mehr sein / auch gotis barmhertzigkeit nit mer
haben / sondern von gottis vñ Christus augen / also ver
tilgt seyn / das man seiner vor Got / nicht mehr wolge
dencken solt / vnd das er vngern begeret / etwas vor
Christo sein. Das velleicht der leydige teuffel nit wun
schen kundt. Das weyß ich / das der geyst Gottis key
nen menschen / eynen solchen greulichen vnd widerchrist
lichen wunsch eingeben mag. Darumb hats Paulus
auch nit so vber teuffelisch gemeint.

Das etliche

Das etliche Mosen zu Paulo setzen / vnd sprechen / Exo. 32:
das Moses begert hab / auß dem büch des lebens getilgt
werden / thut nichts zu obertzelter rede Pauli / denn es ist
noch nicht entschlossen / was das büch des lebēs sey / auß
welchen Got die ihene vertilgt / die yhme sundigen.

Zum andern / wissen wir wol / das got Mosi eyne saw
gab / das er so vnweyßlich redet / vnd zu got sprach. Tilge
mich auß deynem büch ic. Den got antwortet yhm also.
Ich wil dennest den auß meynem büch tilgen / der an mir
sundiget / als wolt er sagen / gehin / vnd sage mir nicht /
ich wil die sundt straffen / yhm tage meynen heym such
ung / vnd yhr nichts schonen.

Darauff ich verstehn /
das Moses sein vnweyße bit faren ließ / vnd Gotis wil
ken mit nichte widerstehn wolt / vil mynder wolt Moses
auß dem büch Gottis getilgt sein / für seyne brüder / als
er Gottis meynung verstünd. Darumb reymets sich
nicht in her.

Paulus thet Got bitten / das er den
stachel oder botten / des sathans von yhm nemen wolt /
vnd erlangt nichts von Got / dann ein abschlegig ant
wort / das yhme Gottis gnade gnügsam were. Das
aber was nit so mechtiglich vnd offentlich wider Got /
das Paulus zu der selben zeyt bat / als das gebet Mosi
war. Oder als der wünsch Pauli wer gewesen / wenn er
lautten solt / als yhnen die welt dewott vnd außlegt.

Nemblich das Paulus wünscht / nichts gemein zühaben
mit Christus barmhertzigkeit. Wie möcht er denn
recht gewünscht oder gebeten habenn? Wiltu sagen
Paulus hat nicht gebeten / sondern gewünscht. Darumb
reymet sichs nicht das du von dem gebet für gibst.


Darauff sag ich. Das der wünsch Pauli vnzelicher
massen mehr wider Got ist / dann sein obertzelts gebet /
vnd ydoch verwürff Got Paulus gebet. Wie vil mehr
hett got des Pauli vngötlichē wünsch verworffen so er
das inhieldt / das ym die ganze welt gar nach zu misset.

Es volgt

Ro. 9.

Es volget aber das sich Paulus / mit nichte so vergessig-
lich vergriffen hab / das er sich d̄ barmhertzigk̄eyt Christi
verzeyhen wolt. Das ist sonderlich auß dem zū merckē /
das er seyne Brüdere an den ziehen wolt / an welchem er
selber hienge v̄nd klebet / der do was v̄nd ist Christus
Jesus ein sohn Gottis v̄nd Danids. Darumb solt man
sehen auff die vsachen der reden Pauli / v̄nd yhm seyne
wort nicht beugen / oder in eynen widerchristlichen sym-
verkeren oder ziehen / sodern das halten / das Paulus ehe
die gantze welt het erzornet v̄nd geergert / ehe er sich der
freuntschafft Gottis v̄nd Christi het verzeihē wollen.
Das aber vil gedachter wünsch Pauli / keyn gebet seyn
soll / das laß ich die erkennen / die wissen / wie die got ge-
noße im geyste v̄nd der warheit bitten / den selben gib
ich zū erkennen / ob der wünsch Pauli / nit auß dem geyste
v̄n auß der warheit Gottis außgesprossen sey / die weyl
Paulus saget. Ich gezeug in der warheit v̄nd durch
gottis geyst ic. Das aber laß ich faren / v̄nd ich wolt
das ich auß solchem gemüt / v̄nd so hefftiglich obligen
möcht. Wolte Got / das ich ein verbanter wer von
Christo / für die welt / oder für meyne Brüder /
als ich den inhalt Pauli / von got gelernet /
v̄nd yetzt angezeygt hab. Dazū well mir
v̄nd allen gotfürchtigen der barm-
herzig geyst Gottis helffen.
Amen.

¶ Gedruckt zū Jhen durch Michell
Büchfurer. Anno. 1524.





Fi 3139

ULB Halle
001 605 216


3



TA → OL

mt.







9

Vorstandt des worts Pauli.

Ich begeret ein vorbannter seyn
von Christo vor meyne
Brüder. Roma:9.

was bann und achte.

Andres von Carolstat.

M. D. XXiii.

Zhen.



mbb. 31 d. i

